

21 NOV 1998

MAHATHIR DAN ISTERI TIBA DI IPOH

IPOH, 21 Nov (Bernama) -- Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohamed Ali tiba di Lapangan Terbang Sultan Azlan Shah di sini hari ini untuk lawatan rasmi dua hari ke Perak.

Ketibaan mereka pada pukul 8.50 pagi disambut oleh Menteri Besar Perak Tan Sri Ramli Ngah Talib dan isteri Raja Puan Sri Noora Ashikin Raja Abdullah.

Kira-kira 1,000 orang termasuk pemimpin parti politik Barisan Nasional Perak serta pegawai-pegawai tinggi kerajaan negeri berada di lapangan terbang untuk menyambut ketibaan Perdana Menteri.

Mereka turut merentangkan kain-kain pemedang yang tertera kata-kata "Hapuskan Pengaruh Al-Gore ke Akar Umbi" dan "Sokongan Kami Teruskan Perjuangan".

Dr Mahathir dan isteri kemudian berlepas ke Lumut Yatch Club di Lumut untuk menghadiri majlis perasmian resort pelancongan eksklusif, Marina Bay Resort, bernilai RM50 juta milik YTL Corporation di Pulau Pangkor Laut, petang ini.

Malam ini, Dr Mahathir dan isteri dijadualkan menghadiri pertunjukan konsert di Pangkor Laut Resort.

Esok, Perdana Menteri dijadualkan menutup Kem Pemantapan Kepimpinan Pemuda Barisan Nasional di Kem Bina Negara di Ulu Kenas, Kuala Kangsar sebelum melawat Kilang Mariwasa, yang mengeluarkan barangan perak dan medal untuk pasaran tempatan dan antarabangsa, di Kawasan Perindustrian Kuala Kangsar.

-- BERNAMA  
HK/PBA NAK